



Nuuk, 4. november, 2013

Inatsisartut Suleriaasianni § 37 naapertorlugu makkuninga Naalackersuisunut apequteqaateqassaanga.

(Inatsisartunut ilaasortaq Sara Olsvig, Inuit Ataqatigiit)

Apeqqut:

- 1) **Avatangiisinut tunngassuteqartut tungaasigut paasissutissanik pissarsiniarsinnaatitaaneq, aalajangiiniarnerni innuttaasut peqataasinnaatitaanerak, maalaaruteqarsinnaaneq eqqartuussivimmilu misiliineq pillugit Aarhusimi isumaqatigiissutip Kalaallit Nunaannut atortuulersinneqarnissaanik Naalackersuisut sulissuteqalersaarpat?**

Tunngavilersuut:

Aatsitassarsiorneq pillugu ulluni makkunani oqallissuteqaruttorfinni pingaaruteqarpoq avatangiisinut tunngatillugu nunatsinni innuttaasut inatsisitigut illersorneqarnissaat ilutigalugu qulakkeerniassallugu. Aarhusimi isumaqatigiissut nunarpaalussuarnit, ilagalugu Danmark, atsiorneqarnikuuvoq avatangiisinut tunngassuteqartut tungaasigut paasissutissanik pissarsiniarsinnaatitaanermut, aalajangiiniarnerni innuttaasut peqataasinnaatitaanerannut maalaaruteqarsinnaanermullu tunngassuteqartoq. Nunatsinni inuinaat naalackersueqataanerat innuttaasullu aalajangiiniarnerni peqataasinnaatitaanerak taamatut inatsisitigut qulakkeerinninnikkut avatangiisinut sunniuteqalersitsisumik nukittorsarneqassapput.

Partiit Inatsisartuni sinniisuutitaqartut tamarmik isumaqatigiippat avatangiisit inuillu peqqissusiat isumagalugit aatsitassarsiortoqassasoq, taamatuttaaq partiit tamarmik isumaqatigiippasippat suliniutit aalajangersimasut aallartinnginnerini ammasumik peqataatitsillunilu aalajangiiniartoqartassasoq. Taamaamat pissusissamisuussaaq Aarhusimi isumaqatigiissut Kalaallit Nunaannut atortuulersinneqassappat avatangiisinut aalajangiiniarnernilu peqataanermut atatillugu innuttaasut Inatsisartullu taamaasillugit inatsisitigut toqqammavissarsisinneqassammata.

Ullut suliffiusut qulit qaangiutinnginnerini apeqqut akeqquneqarpoq.